

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS**

---

**PERTANYAAN : BUKAN LISAN**

**DARIPADA : PUAN RUSNAH BINTI ALUAI [TANGGA BATU]**

**SOALAN**

Minta **MENTERI PENGAJIAN TINGGI** menyatakan apakah hala tuju bagi pelajar yang mempelajari bidang Pendidikan dan Latihan Teknikal dan Vokasional memandangkan hanya beberapa universiti setaraf Sarjana Muda sahaja yang ditawarkan kepada pelajar-pelajar.

## **JAWAPAN**

Tuan Yang di-Pertua,

Kementerian Pengajian Tinggi (KPT) sentiasa komited dalam perkembangan program TVET di Politeknik seiring Lonjakan Keempat Pelan Pembangunan Pendidikan Malaysia 2015-2025 (Pendidikan Tinggi) PPPM (PT) ke arah penghasilan graduan TVET berkualiti. Umumnya penubuhan Politeknik adalah bagi menyediakan akses yang meluas kepada program TVET yang berkualiti dan diiktiraf.

Dalam konteks ini, graduan TVET merupakan golongan belia yang bakal menyumbang tenaga kerja bagi memenuhi permintaan industri serta memacu pertumbuhan ekonomi negara. Justeru, bagi menghasilkan graduan TVET yang berkualiti, institusi TVET perlu mengambil langkah strategik dalam meningkatkan kebolehpasaran graduan melalui penambahbaikan kompetensi tertentu yang boleh memberi kelebihan daya saing dalam bidang teknikal dan kemahiran insaniah.

Oleh itu, Mesyuarat Jemaah Menteri bertarikh 30 Januari 2019 telah bersetuju dengan cadangan Pelaksanaan Sistem Jaminan Kualiti Tunggal Pendidikan dan Latihan Teknikal dan Vokasional (*Technical and Vocational Education and Training*, TVET) bagi menambahbaik laluan pendidikan graduan TVET melalui sembilan (9) prinsip artikulasi TVET.

Selain itu, KPT melalui Jabatan Pendidikan Politeknik dan Kolej Komuniti (JPPKK) juga telah menjalankan kerjasama artikulasi program Diploma Politeknik ke Program Ijazah Sarjana Muda dengan *Malaysian Technical University Network* (MTUN) yang memberikan akses kepada graduan Politeknik untuk menyambung pengajian ke peringkat yang lebih tinggi dalam bidang TVET. Kerjasama ini dilihat dapat menyokong dan memenuhi keperluan industri yang memerlukan tenaga kerja mahir dalam bidang ini pada tahap yang lebih tinggi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT KEDUA, PENGGAL KEEMPAT  
PARLIMEN KEEMPAT BELAS**

---

**PERTANYAAN : BUKAN LISAN**

**DARIPADA : YB PUAN RUSNAH BINTI ALUAI  
[ TANGGA BATU ]**

**SOALAN**

**PUAN RUSNAH BINTI ALUAI [ TANGGA BATU ]** minta **MENTERI PEMBANGUNAN WANITA, KELUARGA DAN MASYARAKAT** menyatakan untuk menunjukkan data dan statistik kes penderaan kanak-kanak dalam masa 10 bulan ini bermula dari Januari hingga Oktober 2021.

**JAWAPAN**

Tuan Yang di-Pertua,

Kementerian Pembangunan Wanita, Keluarga dan Masyarakat (KPWKM) amat prihatin dan memandang serius akan kes penderaan ke atas kanak-kanak yang merupakan aset penting yang bakal mencorakkan masa hadapan negara. Akta Kanak-Kanak 2001 (Pindaan 2016) menyatakan penderaan kanak-kanak terbahagi kepada tiga jenis atau kategori iaitu **penderaan fizikal, seksual dan emosi**.

Berdasarkan statistik Jabatan Kebajikan Masyarakat (JKM), kes penderaan kanak-kanak mengikut kategori dari Januari hingga Oktober 2021 adalah sebanyak 3,056 kes. Pecahan kes adalah seperti berikut:

- (i) penderaan fizikal sebanyak **1,320 kes** (43.2 peratus);
- (ii) penderaan seksual sebanyak **1,569 kes** (51.4 peratus); dan
- (iii) penderaan emosi adalah sebanyak **167 kes** (5.4 peratus).

Daripada jumlah tersebut, 2,236 kes adalah kanak-kanak perempuan (73.2 peratus) dan 820 kes adalah kanak-kanak lelaki (26.8 peratus).

JENIS PENDERAAN / JANTINA	JAN – OKTOBER 2021		
	L	P	JUMLAH
Penderaan Fizikal	676	644	1,320
Penderaan Seksual	76	1,493	1,569
Penderaan Emosi	68	99	167
<b>JUMLAH</b>	<b>820</b>	<b>2,236</b>	<b>3,056</b>

Tanggungjawab melindungi kanak-kanak daripada penderaan, penganiayaan dan pengabaian bukan hanya tanggungjawab Pelindung sahaja tetapi melibatkan pelbagai pihak seperti polis, hospital, mahkamah, pertubuhan sukarela kebajikan, ibu bapa, penjaga, kanak-kanak dan komuniti setempat. Kerjasama pelbagai pihak merupakan teras utama dalam penyampaian perkhidmatan berkesan. Antara program yang dilaksanakan oleh JKM seperti berikut:

- i) Sistem Semakan Pesalah Jenayah Seksual Dalam Daftar Kanak-Kanak
- ii) Program Advokasi - Program Keselamatan Kanak-kanak Sahabat B.I.J.A.K: Selamat dan Lindung (*Safe and Protect*).
- iii) Perluasan liputan perkhidmatan Talian Kasih 15999 dan Whatsapp Talian Kasih 019-26 15999 bagi khidmat sokongan, kaunseling, pertanyaan dan aduan;
- iv) Pelantikan Pembantu Pelindung seramai 299 sebagai barisan hadapan bagi menyelamat dan memberikan perlindungan kes penderaan dan pengabaian kanak-kanak; dan
- v) Penubuhan 140 Pasukan Pelindungan Kanak-Kanak (PPKK) dan 133 Pasukan Kebajikan Kanak-Kanak (PKKK) dalam membantu JKM untuk menangani isu berkaitan kanak-kanak di peringkat komuniti.

Selain daripada itu, pada tahun ini Jabatan Perkhidmatan Awam (JPA) turut meluluskan 224 perjawatan Penolong Pegawai Pembangunan Masyarakat (S29) kontrak untuk menjalankan tugas sebagai Pelindung dan Pegawai Akhlak di seluruh Malaysia.

Sekian, terima kasih.

**PEMBERITAHUAN PERTANYAAN BUKAN LISAN DEWAN RAKYAT  
MESYUARAT KEDUA, PENGGAL KEEMPAT,  
PARLIMEN KEEMPAT BELAS 2021**

**PERTANYAAN : BUKAN LISAN**

**DARIPADA : PUAN RUSNAH BINTI ALUAI  
(TANGGA BATU)**

**SOALAN**

**PUAN RUSNAH BINTI ALUAI (TANGGA BATU)** minta **MENTERI PERUMAHAN DAN KERAJAAN TEMPATAN** menyatakan berapa banyak perumahan untuk penjawat awam yang tidak digunakan di dalam Malaysia. Adakah Kementerian berhasrat untuk menjadikan perumahan atau kuarters tersebut sebagai perumahan kos rendah atau pun digunakan untuk kegunaan kebajikan.

**JAWAPAN**

**Tuan Yang di-Pertua,**

Untuk makluman Ahli Yang Berhormat, pelaksanaan cadangan menjadikan kuarters sebagai perumahan mampu milik ataupun untuk kegunaan kebajikan memerlukan penelitian yang lebih mendalam. Cadangan ini melibatkan dasar berkaitan program perumahan dan penyediaan kuarters untuk kakitangan awam, penglibatan pelbagai agensi penyelaras kemudahan kuarters serta akan melibatkan implikasi kewangan. Dalam hubungan ini, Kementerian juga perlu memastikan agar cadangan ini tidak bertentangan dengan perundangan dan prosedur Kerajaan.

Agensi penyelaras utama kuarters kerajaan seperti Bahagian Pengurusan Hartanah, Jabatan Perdana Menteri perlu mengemukakan kajian terperinci dan impak pelaksanaan cadangan tersebut sebelum proses penukaran fungsi kuarters boleh dilaksanakan. Sebagaimana Ahli Yang Berhormat maklum, majoriti penghuni-penghuni kuarters bukanlah penduduk asal kawasan berkenaan. Oleh itu, pertimbangan mengenai aspek perpindahan tempat kerja serta migrasi kakitangan juga perlu dipertimbangkan.

Selain itu, kuarters juga dibina agar kakitangan awam dapat memberikan perkhidmatan dalam tempoh *response time* yang ditetapkan. Penukaran status kuarters akan memberi kesan kepada kecekapan perkhidmatan yang diberikan dan mungkin juga akan meningkatkan risiko keselamatan.

Kesimpulannya, perkara ini memerlukan penelitian yang lebih menyeluruh sebelum sesuatu pengambilalihan kuarters dapat dilaksanakan, dan ianya tertakluk kepada dasar serta peruntukan kewangan semasa Kerajaan.

Sekian, terima kasih.